

INUIT ATAQATIGIIT

INATSISARTUNI



Nuuk 07.07.2011

Inatsisartut suleriaasianni §37, imm. 1 naapertorlugu Naalackersuisunut imaattunik apeqquteqaateqarpunga:

(Inatsisartunut ilaasortaq Olga P. Berthelsen, Inuit Ataqatigiit)

- 1) Bolig støtte aqutigalugu illuliat illersorneqarsinnaasumik aserfallatsaalineri najugarineqarnerilu qanoq sukumiitigisumik Naalackersuisunit nakkutigineqarpat?
- 2) Illut Bolig støtte aqutigalugu aningaasalersukkat najugarineqannginneri aserfallatsaalineqarsimannginnerilu ilisimaneqareersut Naalackersuisunit tiguneqanngitsoortarpat?
- 3) Bolig støtte aqutigalugu illuutit najugarineqanngitsut maannakkorpiaq qassiuneri Naalackersuisunit ilisimaneqarpa?
- 4) Naak Bolig støtte aqutigalugu illuliorsinnaanermi inatsisip § 38-ani erseqqissumik allaqqanngikaluartoq, ilimagaara BSU malillugu illuliaq tunineqarsinnaanngippat Naalackersuisut isumagisaannik illu isaterneqarsinnaasoq. Tamanna Naalackersuisunit uppernarsineqarsinnaava?
- 5) Bolig støtte aqutigalugu illuliat Naalackersuisunit tiguneqarpata, piffissap qanoq siviutigisup ingerlanerani pisisusaqarnera Naalackersuisunit paasineqakkajuttarpa?
- 6) Bolig støtte aqutigalugu illuliat pisisusaqanngitsut pillugit Naalackersuisut kommuninut akeqanngitsumik tiguneqarsinnaanerat pillugu saaffiginnittarpat imaluunniit Naalackersuisut suliaq unitsiinnartarpaat kommunit saaffiginninnissaat utaqqimaarniarlugu?
- 7) Nunaminertanik atuinissamut inatsisaasup saniatigut malittarisassaqaarpa illuutaatillit illuutiminnik inoqartitsinngitsunut aserfallatsaaliinngitsunullu iliuuseqarnissamut kommuninut pisinnaatitsisunik?
- 8) Nunaminertanik atuisarneq pillugu inatsit kommuninut iliuuseqarnissamut naammaginnartumik pisinnaatitsisut Naalackersuisunit nalilerneqarpa, tamatumani illuutaatillit illuutiminnik inoqartitsinatillu aserfallaatsaaliinngitsut eqqarsaatigalugit? (malittarisassat allat apeqquteqaammi siuliani Naalackersuisunit ilanngunneqarumaartussat aamma ilanngullugit)

Tunngavilersuut:

Tasiilamiinninni ilisimatinneqarpunga takusinnaallugulu Bolig støtte aqutugalugu illuliat inigineqanngitsut arlalissuusut, amerlasuutigullu aserfallassimaqisut avatangiisinullu kusanaallisaataasut.

Ilimagaara Nunatsinni sumiiffinni arlaqaqisuni ajornartorsiummut ilisarinnittoqassaquisoq.

Tamanna tunngavigalugu illuutigisanik inigineqanngitsunut aserfallatsaaliorneqanngitsunullu piginnittunut iliuseqarsinnaanermut inatsisitigut pisinnaatitsisinnaasut misissuataarsimavakka.

Bolig støtte aqutugalugu illuliat Namminersorluni Oqartussanut suli akiitsoqarfigineqartunut Bolig Støtte pillugu peqqussut (Inissialiornermut, illunut ataatsimoorussanut, illuliassanut il.il.) malillugu akiitsut akiligassanngussapput, taarsigassarsisup illoq illersorneqarsinnaasumik aserfallatsaalismannippagu, aammalu tamatumuunakkut Naalakkersuisut qularnaveeqqusiussaanni qularnaveeqqut ajorseriartooq paasineqarpat, imaluunniit Naalakkersuisut akuersiteqqaarnagit illoq taarsigassarsisimasup qimappagu. (peqqussummi § 35, nr. 2 aamma 6 malillugit)

Taarsigassarsiat akiligassanngortinneqarnerini taarsigassarsisup taarsigassarsiat erngerluni akilinnippagit, Naalakkersuisut illuliaq tigussallugu aalajangersinnaapput. (peqqussummi § 36, imm. 1 naapertorlugu)

Tamatuma kingorna Naalakkersuisut taarsigassarsisunut nutaanut illoq tunisinnaavaat, taarsigassarsiner-mut atugassarititaasut allanngortinnagit imaluunniit illup teknikkikkut aningaasaqarnikkullu nalinga tunngavigalugu imaluunniit illutut sanaqataaffiusutut tunisinnaallugu, tamatumani sananermi atortussat ilaatinneqarlutik. Kommunimut, peqatigiiffinnut, suliniaqatigiiffinnut inuinnarnulluunniit Naalakkersuisut illoq akeqanngitsumik aamma tunniussinnaavaat. (BSU-mi illuutit pillugit inatsimmi § 38-a naapertorlugu)

Ilisimasakka naapertorlugit illuutigisat Namminersorlutik Oqartussanut akiitsoqarfiunngitsut pillugit, kommunit iliuseqarsinnaapput nunaminertanik atuinermut atatillugu peqqussut aallaavigalugu.

Illu ukiut marlunnik sivilisunerusumik inigineqarsimannikkuni nunaminertamik atuinissamik akuersissut atuukkunnaarsimassasoq isigineqarsinnaavoq. Taamatut pisoqarnerani kommuni piginnittumut nalunaaruteqarsinnaavoq nunaminertamik atuisinnaanermut akuersissut atuukkunaarsinneqassasoq, piffissap aalajangersimasup iluani atuisoqaqqilersimannippat. Akuersissummik piginneqqilernissamut suliaq pisariusinnaavoq piffissaajarnarlunilu.

Allatut ajornarpat kommunip aalajangersinnaavaa illut inigineqanngitsut pisiarissallugit. Taamaalior-toqannginneranili soorunami piginnittoq sumiissusersineqartariaqarpoq, illumillu tunisinessaminik piomassuseqarluni.